



REPUBLIKA E SHQIPËRISË
KUVENDI

MIRATOHET

K R Y E T A R I

Gramoz RUÇI

REZOLUTË

**PËR VLERËSIMIN E VEPRIMTARISË SË INSTITUTIT TË STATISTIKAVE
PËR VITIN 2020**

Kuvendi i Shqipërisë,

Duke njohur misionin e INSTAT-it për prodhimin e statistikave asnjëse, transparente dhe të përditësuara, të cilat ndihmojnë në gjykimin e përdoruesve për proceset e zhvillimit dhe transformimit në fushat ekonomiko-sociale brenda vendit;

Duke marrë në konsideratë se INSTAT-i është prodhuesi kryesor i statistikave zyrtare në vend dhe përgjegjës për koordinimin dhe funksionimin e Sistemit Kombëtar Statistikor;

Duke vlerësuar se statistikatat zyrtare shpërndahen duke respektuar parimet statistikore të përcaktuara në ligj, duke mbrojtur konfidencialitetin statistikor dhe duke siguruar akses të barabartë për të gjithë përdoruesit;

Duke inkurajuar forcimin e bashkëpunimit të INSTAT-it me prodhuesit dhe përdoruesit e statistikave zyrtare brenda dhe jashtë vendit për të plotësuar nevojat e tyre me informacion cilësor e të përditësuar dhe për të qenë të krahasueshëm me vendet e tjera në rajon dhe Europë,

Vlerëson veprimtarinë e Institutit të Statistikave gjatë vitit 2020 në drejtim të:

-Analizimit të rezultateve të Pilotit të Censit, rishikimit të strategjisë, planit të aktiviteteve dhe matjes së impaktit që solli ky proces në koston për kryerjen e Censit.

-Miratimit të planit të vazhdimësisë për 72 aktivitete statistikore, shoqëruar edhe me përditësimin e regjistrit të riskut në kuadër të masave për menaxhimin e situatës së krijuar nga Covid-19.

-Fuqizimit të kapaciteteve IT nëpërmjet ndërtimit të sistemit të integruar të të dhënave (SIMONA), i cili mundëson aksesin e të dhënave mikro në interes të proceseve kërkimore-shkencore, si dhe të stafit të INSTAT-it.

-Zgjerimit të gamës së produkteve në kuadër të edukimit statistikor, duke publikuar për herë të parë gjashtë tema statistikore për kategorinë nxënës dhe studentë, duke publikuar për herë të

parë indeksin e barazisë gjinore për Shqipërinë dhe forcuar bashkëpunimin me botën akademike.

-Krijimit të Komitetit të Prodhuesve të Statistikave Zyrtare për të siguruar cilësinë në proceset e planifikimit dhe ndjekjes së aktiviteteve statistikore.

-Kontributit në drejtim të standardizimit të metodologjive, garantimit të konfidencialitetit, modernizimit të infrastrukturës për përpunim statistikor dhe vizualitetit të produkteve statistikore.

Kuvendi rekomandon që Instituti i Statistikave për vitin 2021 të përmirësojë punën në këto drejtime:

- Të publikojë raportet e rekomandimeve të lëna nga Këshilli i Statistikave dhe aktet e miratuara nga Bordi Drejtues, duke respektuar kufizimet e legjislacionit të fushës për mbrojtjen e të dhënave konfidenciale, si dhe të publikohet pjesëmarrja e anëtarëve dhe mënyra e votimit.

- Të marrë masa për funksionimin e të gjithë mekanizmave organizativë e mbështetës, me qëllim shmangien e shtyrjes së dytë të zhvillimit të Censit të Popullsisë dhe Banesave, si dhe hartimin e një strategjie efektive komunikimi për të rritur ndërgjegjësimin e popullatës për rëndësinë e Censit.

- Të raportojë ecurinë e planit të punës për kryerjen e Censit të Popullsisë dhe Banesave në raportet 4-mujore për ecurinë e Programit të Statistikave Zyrtare që i paraqiten Këshillit të Statistikave dhe këto raporte të publikohen në faqen zyrtare të INSTAT-it.

- Të intensifikojë rolin e Komitetit të Prodhuesve të Statistikave Zyrtare veçanërisht në proceset e përgatitjes së projekt-Programit të Statistikave Zyrtare, si dhe të publikohet veprimtaria e tij në faqen zyrtare të INSTAT-it.

- Të paraqesë brenda vitit projekt-Programin e ri të Statistikave Zyrtare 2022-2026 sipas strukturës së parashikuar nga legjislacioni për statistikat zyrtare, por edhe për të siguruar një Sistem Kombëtar Statistikor me pjesëmarrje më të gjerë institucionesh publike.

- Të finalizojë hartimin e Strategjisë dhe Planit të Veprimit për Censin e Bujqësisë duke planifikuar dhe detajuar elementet më të rëndësishme të projektit, të përgatisë kuadrin rregullator dhe të vlerësojë burimet dhe aktorët që do të përfshihen.

- Të marrë masa konkrete në drejtim të automatizimit të proceseve të punës, të zhvillojë dhe testojë sistemet e Teknologjisë së Informacionit për pyetësonin elektronik e sistemin e monitorimit të procesit në terren dhe të sigurohet për trajnimin e përdoruesve të këtyre sistemeve.

- Të përafrojë në vazhdimësi standardet sipas Parimeve të Kodit të Praktikës së Statistikave Europiane me synim përmirësimin e proceseve të mbledhjes, përpunimit, publikimit të të dhënave dhe rritjen e besueshmërisë në statistikat zyrtare.

- Të mundësojë prezencën në media të përfaqësuesve të INSTAT-it, me qëllim informimin e publikut të gjerë për metodat e përlllogaritjes së treguesve statistikorë në funksion të rritjes së kuptueshmërisë dhe besueshmërisë në statistikat zyrtare të prodhuara.

Miratuar në datën 27.5.2021